

# Jou Kruisiging

## Inhoudsopgawe

- Deel 1** Die Orde van die Woord in die Mens
- Deel 2** Aan My Volk, gekluister aan die Aarde waarin hulle verslaaf is:
- Deel 3** Bekering
- Deel 4** Oor die sewe Geeste se werking in jouself
- Deel 5** Die pad van die Geeste deur die skepping

## Deel 1

### Die Orde van die Woord in die Mens

Die Boerevolk van Suid-Afrika is 'n volk wat hulleself onderskei het van baie pioniersvolke in die wêreld, naamlik dat hulle godvresende mense was wat hul Bybels as kosbaarste besitting beskou het. God was deurentyd erken in hulle daaglikse bestaan. Maar helaas, dit was die volk van die vorige eeu. Die moderne Boerevolk het egter baie afgewyk van hierdie oorspronklike eienskappe en vandag is die grootste deel van ons volk verwêreld en is God slegs iets en iemand wat in nood en dood gesoek word. Die volk gaan egter nou hulle grootste nood binne, met die oorname van die nuwe militante kommunisties oorheersde regering.

Die enigste uitkoms vir ons as volk, is te vinde in juis dit wat die moderne Boerevolk verwerp het, naamlik God self. Hy is altyd getrou en sou die volk hulle weer na Hom wend, sal Hy ons verlos. Dit is Sy ewige Verbond met ons. Dit is egter nie genoeg dat die mens God net sou ken deur nou naartig hulle Bybels te lees nie, - nee, die Woord/JaHshua moet lewend in elkeen van ons opstaan, alvorens Hy na ons gebede sal luister. Dit beteken dat elke gelowige 'n ernstige poging sal moet aanwend om God daadwerklik in liefde te dien. Alle ander afgode sal weggewerp moet word, naasteliefde teenoor hulpbehoewende volksgenote sal lewend moet word in die volk. Dan sal God ons weer aansien en ons uitred uit hierdie penarie waarin ons sondige lewenswyse ons laat beland het. Lees hierdie boekie dan ook met hierdie boodskap in gedagte.

Vanweë die gebrek aan goeie Bybelonderrig vanaf kansels, is dit egter nodig om 'n stukkie Bybelgeskiedenis vooraf vir u deur te gee, wat u in staat sal stel om hierdie belangrike Woord, deur JaHshua Self gespreek, in die regte perspektief te verstaan. Hierdie geskiedenis sal hoofsaaklik gaan oor die groot liefde wat ons Hemelse Vader deur die eeue heen aan Sy volk betoon het.

In die huidige Christen-geloof binne die Boerevolk is daar twee algemene denkrigtings. Die een groep verkondig die Nuwe Testament, en verwerp grotendeels alles in die Ou Testament, veral die wetboeke van Moses, as dat dit verby is en geïgnoreer kan word. Die ander groep daarenteen, verwerp weer grotendeels die Nuwe Testament, veral die geestelike daarvan en hou by die onderhouding van die Wet alleen. Daar sal egter gepoog word om aan u te toon dat alles wat in die Bybel geskryf is, perfek en logies inmekaar pas, vanaf die heel begin en dat niks werklik net eenkant toe gesit en genegeer kan word nie. Ons begin dus heel voor.

## **God se Woord aan Adam en Eva**

Met die skepping van Adam en Eva in die paradys, het God geen wet aan hulle gegee soos aan Moses nie, maar slegs vir hulle gesê: "Julle mag nie!" Hierdie versoek het verwys na die boom van kennis van goed en kwaad, of soos die oorspronklike Hebreeus sê, die boom van kennis van suiwer en besoedel, waarvan hulle geen vrugte van mag geëet het nie. Hierdie versoek het behels dat hulle geensins van die bose kennis moes bekom en daarvolgens handel nie, want hulle was nog nie geestelik sterk genoeg om dit te weerstaan nie. Hulle moes eers `n proeftydperk ondergaan waar die Godheid hulle vir `n tyd alleen gelaat het.

Die geskiedenis sê vir ons dat hulle toe wel die versoek van God verontagsaam het en dat hoogmoed en ongehoorsaamheid die rede daarvoor was, dieselfde sonde wat Lucifer ook lank gelede in die Koninkryk van God gepleeg het. Deur selfverheffing (hoogmoed) het Eva haar man se gesag oor haar negeer en geëet van die satansvrug, Adam het God se gesag negeer en het ook daarvan geëet. So het die hele nageslag van die mens dus `n wortel van boosheid ontvang, wat vandag nog steeds teenwoordig is in elke mens op aarde. Dit noem ons die sondeval.

Die nageslag van Adam het daarna geleef volgens goddelike riglyne, wat van tyd tot tyd deur God Self, of deur Sy profete aan hulle oorgedra is. Daar was nooit `n werklike Wet met strawwe vir oordeel gegee nie, maar slegs versoeke om binne die goddelike liefdesorde te leef. Die straf wat ervaar was, was die gevolge van die mens se sonde, soos met die sondvloed. Hierdie orde van "jy mag nie", het voortgegaan tot by Jakob, die stamvader van Israel. Daarna is die Israelvolk in ballingskap na Egipte en het hulle na 430 jaar heeltemal afvallig geraak van hierdie goddelike riglyne.

## **God se Woord aan Moses**

Moses word by die brandende braambos aangestel as leier van die Israelvolk deur JaHWeH Self, die groot EK IS. Die goddelike Liefde het weereens besluit om Sy Verbondsvolk terug te bring vanuit hulle sondige lewenswyse onder die heidene, na `n goddelike orde van liefde, gelei deur JaHWeH Self. Moses, aangestelde aardse verteenwoordiger van die goddelike Liefde, ontvang die saffierstaf van die Wysheid by ReuEl Jetro (**Boek van die Opregte 77:50**) Moses gaan dus, geestelik geklee in die Liefde en Wysheid na Farao en deur die tien plae wat op Egipte gelê word, deur die oopkloof van die Rooisee en ander wonders in die woestyn, sien ons oorgenoeg bewyse dat Moses ook die goddelike Krag ontvang het van JaHWeH. Deur Moses was die Liefde, Wysheid en Krag dus weer in `n mens werksaam onder die volk, na 430 jaar van ballingskap.

By Sinai gaan Moses die berg op om die wette van die goddelike Liefde te ontvang. Hy kry dit en na veertig dae kom hy weer na die volk toe, wat intussen `n verderflike goue kalf gemaak en aanbid het, Verder het hulle geëet, gedrink en seksuele perverse speletjies bedryf om hierdie Egiptiese gruwel. Die volk het weer teruggeval na hul sondige, heidense, Egiptiese lewenswyse. In sy woede verwoes Moses hierdie Wet van Liefde, geskryf op kliptafels en daar vind `n groot menseslagting plaas in die laer, totdat alle verderflikheid uitgeroei is.

Weer gaan Moses die berg op, en kom nou af met die Wet van Liefde, op nuwe kliptafels geskryf, maar ook met die boek van die Verbond, waarin alle wetgewing van die volk beskryf was, asook `n strafklousule vir die oortreding daarvan. As gevolg van die verderflikheid van die volk het Moses hierdie streng wetgewing versoek, asook die straf vir die oortreding daarvan en dit is hom toegestaan deur God, - daarom was dit ook die wet van Moses genoem en nie die wet van God nie, alhoewel dit nog steeds deur die goddelike Liefde, Wysheid en Krag in Moses gegee is. Saam met die Wet en die Verbond is daar ook `n nuwe orde ingestel vir die Israelvolk, naamlik die Levitiese orde. Hierdie Levitiese orde was `n aardse afbeelding van die hemelse Melgisédék-orde (sien Boek 2 van Volksleiding-reeks) en met die slag van diere as offers het hierdie bloed slegs die bloudruk gedra van die toekomstige offer wat vir ons gebring sou word deur die Godheid Self, in die vorm van ons Verlosser, JaHshua, wat met Sy bloed vir ons `n ewige verlossing sou bring.

Met die strafklousule in die Wet van Moses en diere-offers kon niemand egter die ewige

lewe deelagtig word nie, want as jy die wet sou hou, slegs omdat jy die straf vrees, soos steniging, hoe kan jy dan in die huis van die Vader kom? Offers van diere kon ook nooit verlossing bewerk nie. Liefde vir JaHWeH, en nie vrees nie, moes die norm wees vir redding. Daarom moes alle gestorwenes eers in die doderyk vertoef totdat die Messias die dood oorwin het.

Hierdie orde was egter nodig vir die volk, omdat hulle so ver van die goddelike orde afgedwaal het. Die Levitiese orde het toe baie goed gewerk en die volk het die beloofde fisiese land Kanaän beërwe, maar Moses, met sy afsterwe, die hemelse Kanaän.

### **Die verdere verloop van die Wet onder Israel**

Die hoëpriesters van die Levitiese orde het ook hierna die Rigters van die volk geword en die volk is regeer vanuit die Allerheiligste van die Tabernakel, waar die vlam van die goddelike Wysheid vanaf die versoendeksel van die Verbondsark gebrand het. JaHWeH Self, as goddelike Liefde het dus deur Sy Wysheid vanuit die Tabernakel die Israelvolk gerig en Sy Krag is in menige veldslae beleef deur die volk.

Maar helaas, weer was die volk ontevrede en versoek hulle `n menslike koning om oor hulle te regeer. Die versoek word hulle toegestaan, maar met `n ernstige waarskuwing van God dat hulle die gevolge sou moes dra vir die verwerping van Sy leiding. So kry die volk dus ook konings, party goed, maar meeste sleg en voer hulle verderflike heidense praktyke in Israel in. Uiteindelik word tien van die twaalf stamme in ballingskap weggevoer na Assirië. Hier verloor hulle alle kontak met die godheid. Lateraan word die ander twee stamme ook in ballingskap weggevoer en ook word die Tabernakel en sy inhoud weggevoer. Nou het die hele Israelvolk niks meer gehad nie, - geen Tabernakel en geen koning nie. Juda keer wel terug na Jerusalem na sewentig jaar van ballingskap, maar die tempel sou nooit weer dieselfde wees nie. Ongewenste elemente het hulleself in die Levitiese orde ingewurm en ten tye van die geboorte van ons Messias, was die tempel van Herodus deurtrek met opportuniste wat die tempel misbruik het vir eie gewin. So word die Levitiese orde dan ook by God beëindig deur die moord van Sagaria by die altaar in die heilige (uit Nuwe Openbaring).

### **Die koms van die Lewende Woord**

Kort na hierdie gebeurtenis, met die geboorte van JaHshua, kom `n nuwe orde tot stand, naamlik die Melgisédék-orde van die liefde waar die liggaam van JaHshua die lewende Tabernakel onder die mense word, waar Sy hart die Allerheiligste met die Verbondsark voorstel. Die ewigdurende vlam van die Wysheid, wat eens tydens die Levitiese orde op die versoendeksel van die Verbondsark gebrand het, brand nou in haar hele goddelike volheid in die Seun van die mens Self. Hy, JaHWeH, as die ewige Liefde, die Seun JaHshua as die Wysheid, bemagtig met die goddelike Krag, is nou verenig in die Wese van JaHshua as lewende Tabernakel. Weereens kon die volk uit hulle benarde toestand gelei word, die volk in Juda, sowel as die verstrooides wat eerste in ballingskap gegaan het en wat nou die hele Asië en Europa gevul het.

Almal in die volk het op `n redder en messias gewag, almal het egter net nie geweet in watter vorm Hy sou kom nie. Feitlik alle Judeërs het `n aardse koning verwag wat die hele Juda sou bevry van Romeinse heerskappy en wat Rome uiteindelik ook sou oorwin en sou heers oor die ganse wêreld. Groot was hulle skok toe hulle die lering van die dertigjarige JaHshua verneem, naamlik dat Sy koninkryk nie van hierdie wêreld was nie, maar `n hemelse koninkryk in die harte van die mense. Die meeste wou dit nie aanvaar nie en het hulle rug op Hom en Sy lering gedraai.

Die fariseërs in die tempel het Hom veral gehaat vanweë Sy lering, waar Hy die Judese volk openlik gewys het op hulle, die fariseërs, se valsheid, geveinsdheid en bedrog. JaHshua het hulle openlik beskuldig daarvan dat hulle die genetiese nageslag van Satan was (Matthéüs 12:34). Die fariseërs se “wet van Moses” was lankal nie meer die liefdeswet van Sinai nie, maar was deurtrek van hulle eie mensgemaakte wette. Meeste van die wette kon omseil en verbreek word, indien groot bedrae omkoopgeld aan die priesters betaal was.

Nou het JaHshua die volk twee nuwe wette kom leer, naamlik die wet van liefde teenoor God en die van liefde teenoor die naaste. Maar ook het Hy gesê dat die hele Wet van Moses en die profete daaraan gehang het (Matthéüs 22:40), dit wil sê ook deel is van die eerste twee groot gebooië. Die Wet van Moses kan dus nie net summier verwerp word en die twee nuwe gebooië in die plek daarvan ingestel word nie. Paulus stel dit so in **Hebreërs 8:6**:

*6 Maar nou het Hy 'n voortrefliker bediening verkry vir sover Hy ook Middelaar is van 'n beter Verbond wat op beter beloftes wetlik gegrond is.*

Die voortrefliker bediening is dan nou juis die toepassing van die volle wet, naamlik die twaalf gebooië van liefde, in liefde, sonder die strafklousule van die Mosaïese wet, of die offers van die Levitiese orde. Die Wysheid, JaHshua, kan en wil net vanuit die Liefde (Vader) orde skep. Hierdie Wysheid wil nie oordeel nie (Johannes 12:48), maar net liefde gee. Sien u nou die verskil tussen die Wysheid wat aan Moses, 'n swak mens, gegee is, en die Wysheid wat aan die Elohimseun, JaHshua gegee is? Dit is dan ook hierdie goddelike Liefde waarin ons moet leef om die goddelike Wysheid van die Seun te kry. Dit is die oprigting van die Melgisédék-orde in onself, dit is JaHshua wat in ons opstaan, sodat ons in die gees begin lewe. Dit is die wolkkolom wat oor ons kom, die verborgenheid van die wederkoms in ons (Matthéüs 24:30)

Die hart, setel van die innerlike gees van die mens, het ook vier kamers wat korrespondeer met die vier windrigtings, Noord, Oos, Suid en Wes. Die Verbondsark met sy vier hoeke en ringe is ook die afbeelding van die ware, naamlik die hart van die mens. Die **Liefde** is die Noordelike kant in die hart, die **Krag** die Oostelike, die **Waarheid** die Suidelike en die **Wysheid** die Westelike (uit Profesieë aan die Boerevolk). Die begrip van hierdie vier poorte in die innerlike mens sal u in staat stel om die volgende direkte woord van JaHshua aan Sy volk, die Boerevolk van Suid-Afrika, beter te begryp.

Vervolgens ietwat oor die begrip van die Drie-eenheid van die Godheid wat so dikwels misverstaan word deur die mensdom. Hiermee wil ons graag die denke van die drie-persoonlikheid van die Godheid uit die weg ruim, want God sê self dat Hy Een is (Deut 6:4).

## Deel 2

### **Aan My Volk, gekluister aan die Aarde waarin hulle verslaaf is:**

*Soos aan Nalize gedikteer op 17/4/2009*

Ek bring die Weg tot bevryding, deur die Wet van Moses, as julle die Liefde begryp waarin dit die drie-eenheid IN elkeen tot LEWE roep in My orde. Ek spreek vanaf vandag in harte wat ontvanklik is, hoe My orde van ouds die sleutel tot Volmaakte Menswees word in die poorte van Liefde, Krag, Waarheid en Wysheid.

Wees gereed om, soos Israel van ouds, deur gehoorsaamheid OF jarelange beproewing die land Kanaän in julleself te betree. Die Land is 'n Hemeland wat drup van Liefde en Wysheid op verskillende vlakke van ontwikkeling IN My en daarom mag julle roem op die Glorie en Goedheid van julle Wyse Maker wat julle in eenheid laat floreer met almal wat op dieselfde vlak as jy aanbid. As jy egter om jou heenkyk, sien jy die volk voor My aangesig, wat ook een is en wil wees met mekaar, deur hulle handel en samehorigheid. Ek is die Kern van hulle bestaan en hoe sterker hulle strewe na My (wat vanself oorgaan in dade), hoe groter is die groep met wie hulle kan een word. Fokus dus eerste op My, dan sal die Volkseenheid en eenheid van Priesterdom geskoei wees op die Rots – onwankelbaar.

In hierdie openbaring staan My Woord net so vas, soos Moses se insprake van Liefde in My Skrif. Dit is onveranderlik en die begin van alle werke van wedergeborenes onder die volk. Ek stuur julle binnekort uit om in die Liefde te onderrig, dit is om in die Woord/Wet te onderrig. Wees versterk deur jou anker in die Wet om My uit te dra aan kinders van My Ryk. Só bou hulle en word Een met My van grondslag tot vrugdraende boord. Ek wil oes, is jy gereed? Sal jy deur My Liefde (Wet) die Wysheid hê om My Krag te gebruik in die inwinning van knegte, engele of visse vir My?

My volk, staan op in die ware weg van selfverloëning DEUR die Wet, soos gegee in die Heilige Skrifte en jy sal die roete tot Liefde en nederigheid vind as navolging van My Heilige bestaan. Mag My Woord nooit weer in jou binneste vertrap word, terwyl jy net ten dele verstaan nie. As jy deur die Liefde van die Wet, die Wysheid in jou opneem om My Krag tot aansporing, bekering, vryspreking en redding te gebruik, sal jy die Geestelike reeds op aarde deelagtig word. Dit is nou reeds moontlik.

Die teendeel van jou keuse bly waar, naamlik dat jy deur jou handeling of hartsbegeerte jouself oordeel tot Geestelike dood of steniging. Laat geeneen die ander oordeel nie, want die wet, self, is elkeen se Geregtigheid, dus bewys van jou aanspraak op Lewe of Dood in die Gees. Leef jy reeds as dooie in die vlees, deur jou vlees te dien, het jy jouself uit die midde of eenheid van die vergadering geskuif, want jou strewe is dan teen die Liefde.

Ek spreek daarom weer: Om Een te word met My, is om die Liefde te Lewe en die Wet, soos deur Moses gegee, is die insprake van Liefde en Wysheid in jou hart. Handel daarvolgens, soos Ek, en jy sal Lewe. EK IS LIEFDE, jou dade, jou woorde en jou LEWE. Amein.

Die volheid van die Vader woon in Jahshua, Sy Seun, en ons is gered deur Hom.

## **Die Woord aan My Volk, soos hulle uit Egipte uitgelei word op die Weg na die Land Kanaän:**

*Soos aan Nalize gedikteer op 18/4/2009*

My Volk, waarom wil jy jou verhard teen die Woord in jou, as dieselfde Woord Een is met die Gees wat jou help en rig en bevry? Ek, julle Maker, is julle Rigsnoer en Bevryder, daarom roep Ek julle na die Liefde in julleself om My Woord as Wet aan te neem.

Wees nie goddeloos deur wetteloos voort te handel nie. Daarin lê geen seën en geen Liefde nie. Die Liefde is die dade van die regverdige. Wees regverdig voor My, sodat Ek met jou, soos met Noag en Israel 'n Verbond kan nakom. Die Verbond is reeds gegee en verwoord en jy moet besluit of jy bereid is om jou kant daarvan ná te kom, dan kan Ek met jou Een wees in die Verbond. My Woord staan vas (*Verwys na die Verbond en Geloofte aan die einde van hierdie dokument*).

As jy nie deel wil wees van Israel wat die land Kanaän beërf nie, sal jy moet deel wees van die knegte na wie Ek en My Israel-Priesterdom moet omsien. Dit maak die omvang van die Skepping veel kleiner. As jy deel word van die Skepper, sal jy deel in die vreugde van die Skepper. Dit is 'n ewige vreugde en dit is bedoel om alle Goedheid deelagtig te wees.

My volk, rig jou tot die Lewe deur die kliptafels in jou Verbondsark te heilig. Heilig dit deur die woorde wat ingebrand is daarop, as gewete te gehoorsaam. Dán kan die Priester in jou begin diens doen in die tempel van jou wese. Die hemele sal só vir jou oopvou en die nuwe aarde sal vir jou oopgestel word. Amein.

## **Die Verbond met My Volk vanaf 2008**

*Soos aan Francois gedikteer op 28/10/08.*

My lieflingskinders, hoor die stem van jul Vader. Ek, die Heilige, die Ewige, spreek; julle gelofte sal julle doen ter bevryding van julle volk, omdat Ek julle gekies het as tussenpersone, as middellaers en verteenwoordigers van My volk. Ek wil julle gebruik ter verlossing van die reine en onreine wat nog te red is in My mense. Ek is Sion se Man. Sion is My Bruid en Ek sal Myself bekend maak in haar. Julle Geloofte en klipstapel sal die simboliek wees vir die oprigting van die pilaar in My volk ter bevryding van haar. Ek sê: Wees geseënd in My aarde, want Ek het julle vrygekoop en daarom woon julle in haar. Wees geseënd terwyl Ek, die Leeu van Judah langs julle loop en julle dade betrag. Wees geseënd met My Krag en outoriteit om die bouse te kan bind om My volk te kan red. Ek sal My Geloofte met julle sluit ter wille van julle volk, want omdat opregtes in My volk is, daarom sal Ek hulle spaar, maar reinig. Ek sal reiniging bring vir die wat nog skoon kan kom.

### **My verbond met julle is die volgende:**

Ek, as Vader van alles, rig My verbond op met die geseëndes in Liefdeskrag, My reine blom, wat haar knie nie voor Baäl gebuig het nie. Julle is My pilaar, My vesting vir My volk. Julle

sal julle lewens aflê vir hulle wie My moet dien in die woestyn. Julle sal hulle uitlei en bring in die land Kanaän as julle My take noukeurig sal opvolg. Ek wil hê dat julle monument vir ewig sal staan en so is My ewige verbond met julle gesluit om vir julle 'n Man te wees en julle, saam met julle susters, Judah en IsraEl, My ewige bruid wie Ek sal verlos in die nag wat kom en wat alreeds saamgepak het oor julle, My Lig op aarde.

Dit is My verbond: Verlossing.

### **Julle Gelofte is as volg:**

Onse El, ons Vader, ons ewige Man, vir U ons Meester en vir ons volk. Voor U en U skare van engele in hemel en op aarde, maak ons dié Gelofte, dat ons U Huis sal bou, die Vesting vir die Dogter van Sion. Ons en ons vaders, die vaders van hemel en aarde staan as een, met een hart, deur U verenig om U Liefde en U Barmhartigheid te bring tot diegene wat suiwer van hart en wese voor U mag staan. Ons bring ons lewens as eersgeborenes uit U Lewe en offer dit aan U, ons Maker en ons Man, sodat U kinders en naamgenote hulle skuing en ewige verweer sal vind in die Huis deur U gestig. Neem ons lewens as offer, sodat ons mag terugkeer na ons Bron, sodat U Naam geheilig mag word en U ewige Apartheid mag heers in ons in die ewigheid. U Naam ter ere, Amein.

### **Keuse tot terugkeer**

*Dit is elke persoon se keuse om terug te keer na JaHWeH en om daarna 'n lewe te lei wat heilig is voor Sy aangesig. Hierdie voorafgaande Gelofte vereis dat u ALLES moet opgee vir JaHshua om te streef om lofwaardig te word, of anders gestel, te streef om die wedergeboorte van die gees te bereik. Om dit te bereik, moet u die Geregtheid/Wet in uself toepas om uself te reinig, maar die liefde moet na buite op die naaste toegepas word. Dit is dieselfde as om 'n nederige en deemoedige lewe te lei, ondergeskik aan u gewete. U kan egter ook omgekeerd lewe, naamlik om die liefde op uself toe te pas, dit wil sê, eieliefde, en om die geregtigheid op u medemens toe te pas, dus veroordelend te wees teenoor u naaste se oortreding. Hoe u dus die Godheid vir uself voorstel deur u optrede, sal bepaal hoe God u sal beskou. As u Hom as 'n verterende, toornige God op 'n oordeelstroon sien wat almal moet verdoem wat volgens u aan oortreding skuldig is, sal Hy Homself ook so aan u vertoon en u daarvolgens behandel. As u Hom egter as 'n liefdevolle Vader sien wat Sy kinders met baie deernis liefhet, en u u medemens ook so liefdevol en barmhartig behandel, sal Hy Hom ook so aan u openbaar en u so behandel. Met laasgenoemde lewenswyse is dit dan eers wanneer die sewe Geeste van God ten volle in u begin werk en u dan waardig word om Sy verteenwoordiger op aarde te wees. Self verdien u egter niks, dit is slegs Sy groot genade en barmhartigheid wat dit vir u gee.*

## **Deel 3**

### **Bekering**

Soos aan Nalize gedikteer op 30/4/2009

Wie soek sal vind, daarom sal elkeen by My vind waarna hy/sy soek. As jou begeerte Medelye of Oordeel is van die Almagtige, sal jou hart jou dade so rig en jou begeerte is wat jy sal ontvang. As jy hierdie in vrees verlang, sal dit met tyd aan jou gegee word, maar as jy met vrede en volle vertroue daarna verlang, sal dit jou in jou daaglikse wandel gegee word. Bly warm in jou geloof en jy sal jou tekortkominge vinnig waarneem met wat Ek oor jou pad toelaat. As jy nie lank wag om die tekortkominge uit te sorteer nie, sal Ek ook nie lank wag om My geheimenisse met jou te deel nie.

Uitsorteer behels deeglike ondersoek in jou hart oor alles wat jy dink en voel wanneer jy iets doen. As jy die uitgewysde fout by jou hart, liggaam of verstand bemerk, as gevolg van 'n mate van liefdeloosheid, moet jy in berou en respek tot My keer en Ek sal jou was in My Bloed. Dit beteken ook dat Ek jou sal vergewe in My groot Liefde. Só wil Ek ook hê moet jy ander hanteer wat met jou sake uitsorteer. Ek is egter nie kwaad totdat jy weer in vrede met My leef nie. Ek laat jou net oor aan jou swakheid van angs, vrees of selfverwyt wat jy vir jouself geskep het. Wees verblyd dat die saak ook tussen My en jou bly en Ek jou in Barmhartigheid weer Vrede en rus laat ervaar in My Liefde sodra jy tot My Orde terugkeer. Hanteer jou naaste ook Barmhartig en My orde sal onder julle seëvier.

Laat dit ver van jou wees om wrewel en ergernis te ervaar en in jou hart gevange te hou teenoor andere vir enige misstap en swakheid, maar wees jý die nederige wat vergewe om jou Rus in My deelagtig te bly. Op die punt waar die ander party van sy swakheid bewus raak en My óf jou om verskoning kom vra, moet jy My handeling weerspieël. Laat My Lig dan altyd só deur jou skyn en jy word waardig Mens na My Beeld. Amein.

## Deel 4

### Oor die sewe Geeste se werking in jouself

#### Van JaHshua aan Johan op 14/4/09

**Die Gees spreek:** "In **Liefde** het ons ontwaak, in **Barmhartigheid** met baie **Geduld** dien ons vir Jahshua en is ons besig om in sy **Wil** oor te gaan. Mag ons dit met **Erns** bereik, sodat ons dan **Orde** kan skep en dit handhaaf om in **Wysheid** te gedy.

1	Ontwaak	Liefde	
2	Skep	Lig	= Elohim
3	Gedy	Lewe."	

**Rom 8:5** *Want die wat vleeslik is, bedink vleeslike dinge, maar die wat geestelik is, geestelike dinge.*

**Rom 8:6** *Want wat die vlees bedink, is die dood, maar wat die Gees bedink, is lewe en vrede,*

**JaHshua spreek:** "In 'n liefdevolle vreedsame gedeelte in jou aarde (hart) sal jy lewe en werk, waar My Gees die leidende party is in Liefde, om die geestelike honderd persent suiwer oor te dra aan My honger volk wat nog vleeslik handel. Die tragiese gebeurtenisse is op hande wat skrikwekkende gevolge gaan hê! Nou moet julle volhard in gebed vir julleself en die volk. Al lyk dit nie so nie, is Ek ten volle in beheer oor My totale skepping. Liefde herken Liefde en My Liefde vir julle is oneindig. Jahshua, met Liefde. Amein."

#### JaHshua spreek op 24/4/09

**Die Gees spreek:** "Met Sy Liefde en Almag kan ons nie anders as om te oorwin nie, met Sy Barmhartigheid en Geduld is daar redding vir ons en die volk. Dankie Jahshua."

**Rom 8:35** *Wie sal ons skei van die liefde van Christus verdrukking of benoudheid of vervolging of honger of naaktheid of gevaar of swaard?*

**Rom 8:36** *Soos geskrywe is: Om U ontwil word ons die hele dag gedood, ons is gereken as slagskape.*

**Rom 8:37** *Maar in al hierdie dinge is ons meer as oorwinnaars deur Hom wat ons liefgehad het.*

"Ja, julle is oorwinnaars en sal aanhou wen met My Liefde, Geloof en Lig en is baie naby

aan die doel om te Lewe in 'n ongeëwenaarde vrede, in My Ryk en Orde van Liefde. Julle Man Jahshua, met al My Liefde vir julle. Amein.”

## Deel 5

### Die pad van die Geeste deur die skepping

#### Inleiding:

Elkeen van ons, as gelowige kinders van God, sal weet dat daar ontelbare engelgeeste in die hemele is. Hulle lewe in ewige gelukkige saligheid in die teenwoordigheid van ons Hemelse Vader. Talle van hulle is ook betrokke by ons hier op aarde, deurdat hulle ons vanuit die geestesfeer lei en rig.

Vanuit die Bybel leer ons ook dat daar 'n groot groep engele is wat teen die Godheid gerebelleer het, onder hulle hoofengel, Lucifer. Hulle is toe deur God uit die hemele uitgewerp. Min is verder vanuit die Bybel te kry oor hierdie onderwerp, behalwe dat Jesaja 14:15 sê dat hulle in die doderyk, wat binne die aarde is, gewerp is. Dit wat egter in die doderyk in die middel van die aarde vasgehou word, is egter net die oorblywende deel van die skeppende entiteit van Lucifer, naamlik sy bose gees, wat ook somtyds Satana genoem word. Vir u wat al reeds van hierdie Volksleiding-reeks boekies gelees het, sal weet dat die gehele materiële skepping eintlik niks anders is as die gevalle gees van Lucifer wat verhard is nie, as gevolg van sy verharding en gevolglike rebellie teen God self. Alles wat materie is, is dus deel van die oergees Lucifer en huisves gevalle sieledeeltjies wat gebonde is en wat deur geleidelike opwaartse beweging bevry moet word.

Die doel van hierdie boekie is om aan die leser te toon wat in die geestelike sfere plaasgevind het, ontelbare miljarde eons van jare gelede, toe die Godheid besluit het om engelgeeste buite Homself te skep. Ook word die rebellie van Lucifer met 'n derde engele onder hom aangetoon. Die maklikste manier om hierdie inligting weer te gee, is om 'n vloediagram te gebruik ter illustrasie. Deur plekke op die diagram te nommer en sodoende die roetes aan te dui wat bespreek word, sal die leser 'n makliker verduideliking kry as ellemalige geskrewe gedeeltes.

Die ingeslote vloediagram is saamgestel uit inligting vanuit die Boek van Herinnering, die Nuwe Openbaring van ongeveer 170 jaar gelede en onlangse profesieë aan die Boerevolk. Hierdie vloediagram verduidelik die samestelling van die Godheid, soos vanaf die oneindige verlede tot in die oneindige toekoms vir alle geskape Geeste. Die oergeskape Geeste het twee duidelike roetes gevolg, - eerstens is dit die Geeste in die Goddelike orde wat by Vader gebly het en tweedens die Gees van Lucifer wat gerebelleer het. Elk van hierdie twee geeste-orde het nog oneindige sub-skeppingsordes onder hulleself, en daarom is daar ook nog ontelbare geesteswesens in elke geskape Gees se ryksgebied.

Om net effens te verstaan van hoe lank die tydperke is wat ons hier mee te doen het, die volgende: Gestel u neem 'n sandkorreltjie en ken 'n waarde van 1 miljoen jaar daaraan toe. Gestel u pak verder die hele oppervlak van die aarde toe met sulke sandkorreltjies, styf teen mekaar gepak. Tel dan al hierdie miljoene jare bymekaar. Dan het u nog nie by die tyd uitgekom toe Lucifer gerebelleer het nie! (Inligting vanuit die Nuwe Openbaring) Hoe lank terug lê die skepping van die oergeskape geeste nie nog nie! Dit is dus duidelik dat ons as vleeslike mense, nooit werklik tyd in die geestelike dimensie sal kan begryp nie. Kom ons begin nou met die verduideliking van die pad wat geskape geeste deur die skepping geloop het en voortaan nog sal loop. Verwys asseblief van nou af na die ingeslote vloediagram.

Die een roete, **Roete [3-7]**, van links na regs, in reënboogkleur aangedui, is die roete wat die nie-gevalle Geeste kan volg as hulle kinders van die Hemelse Vader wil word. Let wel dat hierdie Geeste oneindig salig geskape was, maar dat hulle altyd die status van knegte sou hê in die hemelryk. Deur die menswording, dood en opstanding van ons Verlosser, JaHshua, het hulle nou die geleentheid verkry om ook menslike liggame te kom aanneem op aarde, dit wil sê, om op aarde gebore te word. Indien hulle lewensproef op aarde geslaagd

was, word hulle in die Hemelse Vaderhuis opgeneem as kinders van God, wat `n saliger toestand is as die van kneg.

Die ander roete, **Roete [2-4-6-7] en [2-5-7]** van links na regs, in groen aangedui, is die roete wat Lucifer gevolg het nadat hy homself verhef het teen God, en deur sy hoogmoed tot `n val gekom het. Let op dat hy ook `n groot groep, een derde nie-rebelle, saamgesleep het die materie in.

### **Die begin:**

In die oneindige verlede is en was God altyd daar, as ontoeganklike Godheid **[1]**, gebaai in ewige goddelike Lig. Niks buiten die Godheid Self kon bestaan in hierdie fel deurdringende Lig nie. Toe het God besluit om wesens te skep buite Homself, geestelike wesens wat geskape sou word na Sy beeld en gelykenis. Kyk na die vloeiagram links bo.

Die eerste drie Wesens wat Hy buite Homself geplaas en geskep het, het Hy genoem, LIEFDE, LIG en LEWE **[2]**. Vanuit hierdie drie het die hele verdere Geestelike skepping ontstaan. Neem asseblief kennis dat die materiële skepping waarin ons nou in leef en wat ons ken, toe nog lank nie bestaan het of sou bestaan nie. Alles was Gees en tydloos. Hier volg `n uittreksel uit `n onlangse profesie aan die Boerevolk:

*Uit Gesprekke met die engele, Hoofstuk 6 en 7, deur JaHshua aan Marietha*

*Jahshua: Dit is Drie Groot Vorste wat die Wese van MY voorstel. Lig, Lewe en Liefde. Die eerste daarvan is Liefde, wat gelyk is aan die Bestaan of Ontstaan en die tweede is Lewe wat uit die Warmte van Liefde ontspring. Die derde hiervan is Lig, Hy staan vir MY Wysheid, wat die Lig is van die geskape nes. Verstaan dat hulle net die Uitbeelding van MY Wese is, want EK is nie `n drieledige Godheid nie. Die Wese van MY kan kom in Wysheid of net in Liefde of in Krag, maar EK IS Éen en oneindig. Die Drie is MY Heilige en Aparte Vorste wat die Liefde, Wysheid en Krag uitbeeld.*

*Jahshua: EK gaan jou eers vertel van die Drie; Aan die begin was daar Drie en die Sewe het uit hul voortgekome, maar die Éen, gelyk aan die Lig van God, wat EK IS, het geval. Sy naam noem julle **Lucifer of Ligdraer**. Maar EK het dadelik `n Vors geroep om die plek te vul van die gevallene, jy vra nou hoekom EK dadelik `n ander Vors in sy plek gestel het? Dit is om ewig uit te beeld dat MY eienskappe sal bestaan. En die Vors wat EK geroep het om in Lucifer se plek te staan, is ook die gelykenis van die Lig. Die één wat dit waardig is, kry die plek by MY, of het jy gedink dat die plek leeg moet bly? As EK die plek sou oop los, dan is daar net twee om MY Wese uit te beeld, dit wil sê, Liefde en Lewe, maar niks kan ontstaan sonder Lig nie, en dus herstel EK die simboliek.*

### **Die val van Lucifer:**

Een van hierdie drie, die LIG **[2]**, was die oergeskape Engel van die Lig, naamlik Lucifer. Hy het homself hoër begin ag as God Self, en het homself laat aanbid deur sommige van die geskape engelgeeste onder Hom. Deur hierdie gruwelike hoogmoedsdaad van hom, het hy uit die Goddelike skeppingsorde van die Liefde beweeg en is hy uitgewerp uit die Koninkryk. Een derde van die engele **[4]** het hom gevolg in sy rebellie, maar twee-derdes **[5]** het getrou gebly aan God. Hulle moes egter ook uit die Koninkryk van die Geeste uitgewerp word, as gevolg van die feit dat hulle in hierdie ryksgebied van Lucifer geskape was en hy eintlik hulle skeppingsvader was, alhoewel hy, Lucifer, hulle slegs geskep het met die Lewe of Krag wat hy vanaf God ontvang het. Hierdie val word as volg beskryf in **Jesaja 14:12-15**:

*12 Hoe het jy uit die Hemele geval, o Heylel (Lucifer), seun van (die dageraad)! [Hoe] lê jy teen die Aarde neergeslaan, oorweldig van die nasies! 13 En jy het in jou hart gesê: Ek wil opklim in die Hemele, my troon verhef bo die Sterre van El en sit op die berg van samekoms in die uithoeke van die Noorde. 14 Ek wil styg bo die hoogtes van die wolke, my gelykstel met die Hoogste El! 15 Ja, in die Doderyk/Sheol sal jy neergewerp word, in die diepste plekke van die put!*

Hier moet duidelik gelet word op die feit dat hierdie val oor onmeetlike tye gestrek het en dat dit nie `n eenmalige gebeurtenis was wat plaasgevind het nie. Soos wat Lucifer homself verhef het, het hy ingeboet met Lig wat nodig was om voort te gaan met sy eie skepping. Deurdat hy Lig verloor het, het sy skeppings ook al hoe meer duister begin word, totdat God

Self besluit het om sy skeppingsmagte in te trek, hom uit te werp uit die Koninkryk van die Geeste en in die materie te laat gevange neem. Die kern van Lucifer se wese, sy skeppingsgees wat al verskriklik duister en boos geword het, is in die kern van die aarde gewerp en word tans deur ander engelgeeste vasgehou. Sou hulle een millimeter skietgee, sal die hele materiële skepping verwoes word, so boos is hierdie gees! Dit is hierdie bose gees, Satana, wat voortdurend haar boosheid laat opbruis in ons aardse skepping, vandaar die wreedheid, liefdeloosheid en alles wat negatief is op aarde.

Die verhaal van Kaïn en Abel wat ons ken, vertel eintlik wat hier in die Gees met die gevalle engele gebeur het. Adam en Eva, aanvanklik in die Tuin van Eden, wat die Koninkryk van die Geeste voorstel, rebelleer soos Lucifer (Adam) en sy gees Satana (Eva) teen God en word uit die Tuin van Eden verjaag. Adam en Eva se twee kinders stel die twee groepe geeste in Lucifer se ryk voor wat hy geskep het en wel as volg: Kaïn, die moordenaar, stel eintlik die een-derde geeste voor wat gerebelleer het, terwyl Abel, die vermoorde, die onskuldige twee-derdes voorstel wat vermoor is, oftewel wat afgesny is van die ewige lewe. Beide was vooraf uit die ryk (tuin van Eden) uitgewerp saam met hul ouers, wat die val na benede voorstel van Lucifer (Adam) en sy skeppingsgees, Satana (Eva).

Hierdie twee groepe van die ryk van Lucifer, naamlik `n donkergroen afwaartse pyl wat die een-derde [4] rebelle voorstel en die dikker ligtegroen pyl wat die twee-derdes [5] voorstel wat nie gerebelleer het nie, maar wat noodgedwonge die pad van die materie moes loop. Beide groepe begin afwaarts val, die dieptes in, namate Lucifer homself meer en meer begin verhef teen God. Satana, die skeppingsgees wat Lucifer vir homself geskep het (Openbaring van Henog 11:53), word egter deur God toegelaat om verder te skep, met die hoop dat Lucifer berou sou toon en hom bekeer. Hoe verder sy egter gaan, hoe minder Lig ontvang sy en hoe meer duister, swart en besoedel word haar geskapenes. Let op dat hulle ook nog almal geeste was wat sy geskep het, want nóg het daar geen materiële skepping bestaan nie. **Openbaring van Henog 11:53-54:**

*53 Die Duiwel is die gees van besoedeling van benede, as `n vlugteling het hy Satana (of Sotona) van die Hemele gemaak omdat sy naam Sataniël was, so het hy verskillend van die boodskappers geword, 54 maar sy geaardheid het nie sy intellek [kennis] verander wat sy begrip van Geregtigheid en oortreding betref nie.*

Hierdie geskape geesteswesens het toe verder gegaan en nog meer besoedeling in die geestelike sfeer aangerig en God wou hierdie hele ryk vernietig, want in Sy Geregtigheid kon Hy nie hierdie rebellie toelaat nie. Hierdie gevalle skepping word skematies voorgestel deur `n afwaartse donkergroen pyl wat gaandeweg swarter word soos wat die skepping verder en verder besoedel geword het deur Satana. Die val van hierdie geesteskepping eindig by die bopunt van [6] waarna die materiële skepping sou begin, wat `n nuwe herstelfase is wat deur die Liefde van God geskep is.

### **Redding vir die gevallenes:**

In die middel van ons vloekaart sien ons dan hierdie grys vierkant, wat die aarde voorstel wat geskep is om alle gevalle geeste te reinig. Die skepping van die aarde strek ook oor talle miljoene jare, wat in vyf groot voorafgaande skeppingsperiodes ingedeel is, voor die skepping van Adam in Genésis (uit die Nuwe Openbaring). Die hoofdoel van hierdie vyf periodes was om die gevalle gebonde sieledeeltjies van Lucifer opwaarts te laat beweeg deur die drie materiële ryke, naamlik die minerale ryk, die planteryk en die diereryk. Eers nadat die gevalle rebelle sieledeeltjies hierdie lang pad geloop het, kon hulle weer saamgevoeg word in `n eenheid en in `n menseliggam geplaas word. Dit was dan waarvoor die sesde periode geskape was, naamlik om hierdie saamgevoegde gesuiwerde sieledele, wat nou `n siel geword het, in `n vleeslike liggaam te plaas en te begiftig met die “asem van die lewe” (goddelike Gees) en aan hom die keuse te gee om God of Lucifer te dien. So verkry hierdie gevallenes dan ook die moontlikheid om weer in die Koninkryk van God te kom, hierdie keer, nie as dienede geeste nie, maar as gehoorsame kinders in die Vaderhuis, soos voorgestel deur punt [8]. Hierdie onderwerp sal verder as volg belig word:

Alles het gebeur deur die Liefde, wat buite God geplaas is [2], en Sy het hierdie wesens,

naamlik die onskuldige twee-derdes, sowel as die rebelle, oneindig jammer gekry en Sy het ingetree by die Vader dat Hy hulle nie moes verdelg nie, maar moes laat voortbestaan met die moontlikheid om uit die besoedeling van hulle ryk te kom.

Deur God se oorgroot barmhartigheid het die materiële skepping toe ontstaan, wat in der waarheid slegs `n verharding van die gevalle geestelike skepping van Lucifer is. Omdat Lucifer sy hart verhard het, is sy hele skepping in ontelbare klein deeltjies opgebreek en verhard. Hierdie kleinste deeltjies word sieledeeltjies genoem en ons ganse heelal bestaan daaruit. Hierdie sieledeeltjies het twee fasette, naamlik `n geestelike faset wat ons nie kan sien nie, soos byvoorbeeld die eienskap van magnetisme of elektrisiteit en die materiële deel wat ons kan sien, soos atome en elektrone. Ons aarde bestaan uit drie ryksgebiede van materiële sieledeeltjies, naamlik die gesteentes, die plantewêreld en die dierewêreld. Elke korreltjie van hierdie drie materie-ryke verteenwoordig die eens gevalle geestelike in Lucifer se oorspronklike geestelike ryk waarin hy homself verhef het. In hierdie drie gebiede is daar dus oneindige lewende gees vasgevang en gekluister in materie vir oneindige lang tye.

Verwys na die skematiese diagram, bopunt van [7] en sien dat hierdie volgende fase die begin van die materiële skepping is waar die sewe oergeeste behulpsaam raak met die gevallenes en dit word voorgestel deur die reënboog wat as `n punt begin en langsamerhand breër word [6]. Deur `n unieke proses van opwaartse en vryer beweging deur hierdie drie ryke verbeter en veredel hierdie sieledeeltjies hulleself en raak hulle geskik om na miljarde en miljarde eons (`n eon is `n een met 60 nulle!) van tye weer in `n selfbewuste menslike gestalte opgeneem te word, wat ons dan die Adamitiese skepping sal noem, wat ongeveer sesduisend jaar gelede ontstaan het. Sien punt [7].

So `n saamgestelde siel word dan deur die bemiddeling van ander dienende engele in die geestesryk geneem en in die baarmoeder van `n aardse vrou geplaas tydens verwekking. Hierdie klein siel ontwikkel dan in die baarmoeder as `n volwaardige mens met `n eie denke en vrye wil. Ook word die “asem van die lewe” in die mens ingeblaas en die mens kan homself ontwikkel tot `n gehoorsame kind van God, of hy kan weer rebelleer en `n kind van Lucifer word. Die grootste gawe wat elkeen nou het, is die vrye wil. Nou bestaan die mens dus uit drie dele, naamlik die liggaam of vlees, die siel of saamgestelde sieledeeltjies en die oergees van God, dus `n ware beeld en gelykenis van die Godheid. Hierdie roete sal gevolg word deur elke rebellegees van hierdie ryk.

### **Barmhartigheid vir die nie-gevallenes:**

Elke ander gees van die twee-derdes wat nie gerebelleer het nie, se lot is anders en wel as volg: Hierdie geesteswesens lewe nou as vleeslike of geestelike wesens op die talle ontelbare planeete, sonne en sterre in ons heelal. Elke ster, planeet of son wat in die sterreheemel sigbaar is, is `n bewoonbare aarde met wesens daarop (Nuwe Openbaring). Hulle het `n mate van saligheid waar hulle tans lewe, maar kan slegs beperk groei in saligheid. Hulle ken God slegs as die Groot Gees en nie as `n liefdevolle Vader nie, alhoewel hulle almal bewus is dat die vlak van volwaardige kindskap wel bereik kan word, maar dan moet hy vrywillig aarde toe kom vir `n lewensproeftydperk. Die aarde as planeet van verlossing, is deur God Self uitgekies, waar Hy die groot verlossingsplan vir Sy geeste sal uitvoer. Die gees van Satan, naamlik Satana, is ook in die middel van die aarde gewerp, waar die doderyk met sy duiwels en demone ook is, sodat die mens ook sal moet leer staan teen die felle aanslag van die bose, want slegs hier op aarde kan elke gees die hoogste saligheid verkry, naamlik kindskap in die Hemelse Vaderhuis.

Vir elk van hierdie nie-rebelle geeste is daar egter geleentheid om self te kies of hy wel aarde toe wil kom, om die proeftyd van die vlees te wil deurgaen al dan nie. Hy gaan dus op sy planeet `n ooreenkoms aan met die Godheid en dan word hy vrywillig as siel, met geen geheue van sy vorige lewe, in so `n menslike baarmoeder geplaas om op aarde verder as mens te lewe en te kies vir JaHWeH of vir Satan. Slaag hy hierdie lewenstoets, gaan hy oor in die salige ryke van die Hemelse Vader en word hy `n kind van die Vader. Hierdie pad word voorgestel in ons vloekaart as die groen pyle van die twee-derdes wat links inbuig na die adamitiese skepping toe [5-7].

Dit bring ons dan by die skepping van Adam en sy nageslag en die verdere geskiedenis van die menslike geslag soos opgeteken in die Heilige Skrifte. Almal weet dat hierdie skeppingsperiode van ons drie duidelike afdelings het, naamlik die eerste periode vanaf Adam tot by die opstanding van JaHshua, ons Verlosser. Die tweede periode strek tot aan die begin van die Duisendjarige Vrederyk en die derde periode is die Duisendjarige Vrederyk. Hierdie drie duidelike verlossingsperiodes word in ons vloekaart aangedui. Alle gestorwe geeste van mense moes in die eerste periode in die doderyk gevange gehou word, totdat ons Messias opgestaan het uit die dode in die tweede periode en die gereddenes saamgeneem het na die Koninkryk van die Vader in die hemele. Na die opstanding van JaHshua kon elke geredde gestorwene nou direk na die Vaderhuis gaan.

Nou in die tyd waarin ons lewe, aan die einde van die tweede periode (sesduisend jaar vanaf Adam) word dit moontlik om deel te word van `n nuwe orde wat in die derde periode, die Duisendjarige Vrederyk, heerskappy sal voer oor die totale materiële skepping in die heelal. Hierdie orde word genoem die Melgisédek-orde en word in werking gestel wanneer die Meester in die huwelik tree met Sy volk. Sonder om nou in te veel detail in te gaan hieroor, moet u slegs kennis neem dat u nou ook `n verhoogde saligheid kan kry, alreeds hier op aarde, deur uself volkome oor te gee aan ons Verlosser en Saligmaker, JaHshua. Die doel van hierdie Volksleiding-reeks boekies is dan juis om u na hierdie salige toestand te lei, waar u as Sy waardige bruid ook dit sal ontvang wat Adam eens gehad het, naamlik die volle Liefde, Lig en Lewe in uself.

Nou vervolgens na die vloekaart, links bo, en wel na die Geestesorde van Sewe onderkant die orde van die Liefde, Lig en Lewe [3].

### **Die sewe oergeeste van God:**

Hierdie sewe geeste word voorgestel deur die sewe kleure van wit Lig, asook deur die sewe kleure van die reënboog. Diagram punt [3]. Die kleure is **Rooi, Oranje, Geel, Groen, Blou, Indigo en Violet**. Hierdie kleure verteenwoordig ook sewe eienskappe van die Godheid naamlik:

#### **Die sewe eienskappe is:**

1. Rooi vir **Liefde**,
2. Oranje vir **Vrolikheid** van hart,
3. Geel vir **Lydszaamheid** en **Deursettingsvermoë**,
4. Groen vir **Geloof**,
5. Blou vir **Vrede**,
6. Indigo vir **Vriendelikheid** en
7. Violet vir **Geduld**.

#### **Die sewe Geeste is as volg:**

1. **Liefde**,
2. **Wysheid**,
3. werksame **Wil**,
4. **Orde** van God,
5. **Erns**,
6. **Geduld** en
7. **Barmhartigheid**.

Elkeen van hierdie sewe engelgeeste het `n naam en ons vind dit in die Boek van Herinnering in **Henog 20**:

**1** *HIERDIE is die name van die Boodskappers/Engele van die Kragte wat waghou.*

**2** *UriEl, een van die Boodskappers van Apartheid, naamlik die Boodskapper van donderslae en van aardbewings, [wat aangestel is oor die wêreld en oor Tartarus]. [Openbaring 10; 2 Ezra 10:28]*

**3** *RafaEl, een van die Boodskappers van Apartheid wat aangestel is oor die gees van die*

adamiet.

**4 RaguEL**, een van die Boodskappers van Apartheid wat wraak neem op die wêreld en die ligte.

**5 MikaEL**, een van die Boodskappers van Apartheid, naamlik, hy wat aangestel is oor die beste deel van die nasie en wat oor die chaos en die nasies heers. [DaniEL 12:1]

**6 SarakâEL**, een van die Boodskappers van Apartheid wat aangestel is oor die geeste van die adamiete wat ander geeste laat oortree.

**7 GabriEL**, een van die Boodskappers van Apartheid, wat aangestel is oor die Paradys en die Nagashim/slange en die Gérubs. [Lukas 1:19]

**8 RemiEL**, een van die Boodskappers van Apartheid wat JaHWeH aangestel het oor hulle wat in opstand kom.

Elkeen van hierdie Boodskappers of Engelgeeste is oneindige groot wesens, elkeen met Sy eie ryksgebied waarin miljarde geskapanes woon. Elkeen bevat wel al sewe eienskappe van die sewe geeste, maar sal oorwegend sy eie kleur of eienskap uitdra. Hulle is egter almal salige dienende knegte en is altyd diensbaar en werksaam in die hele skepping, en ook in die gevalle skepping help hulle om die dinge weer te herstel. Die enigste manier waarop hulle die Godheid ken, is ook as Groot Gees en nie as liefdevolle Vader nie. Hulle ervaar wel Sy Liefde, want hulle is nog almal werksaam in die Liefde, maar die verhouding is nog altyd die van kneg teenoor sy Meester.

Nou het God ook vir hulle die wonderlike geleentheid gegee, naamlik om ook vlees te kom aanneem op aarde en dan kan hulle ook sodoende salige kinders van die Hemelse Vader word. Hierdie pad word in ons diagram voorgestel as 'n reënboogpad [3-7] met afwaartse pyle na die gevalle skepping toe, wat aandui dat so 'n gees vrywillig sal moet val, dus vrywillig gaan sondig deur vlees aan te neem en die stryd teen Lucifer aan te sê om te oorwin om dan sodoende sy kindskap te verkry. So verruil hy dan sy salige **knegskap** wat hy as engelgees gehad het vir 'n nuwe en beter salige **kindskap** as engelgees. So 'n salige kind kan ook aanbied om meermale aarde toe te kom as sy liefde vir sy gevalle broers baie groot is. So het Elia ook gekom as Johannes die Doper en sal hy weer kom aan die einde. (**Matthéus 11:14** en **Maleagi 4:6**) Lees ook **Jeremia 1:5** en merk op dat ook hy een van hierdie suiwer engelgeeste was wat ingestem het om aarde toe te kom.

**5** Voordat Ek jou (**Jeremia**) in die moederskoot gevorm het, **het Ek jou geken** (as salige engelgees); en voordat jy uit die liggaam voortgekom het, het Ek jou geheilig; Ek het jou tot 'n profeet vir die nasies gemaak (dit was jou ooreenkoms met MY). [Onderstreepte invoegings deur skrywer gemaak ter verduideliking]

So word **Daniël 12:13** ook duideliker vir ons, want ook hy is 'n geroepe engelgees gewees wat weer aan die einde van tye werk sal verrig op aarde as vleeslike mens.

*En jy, gaan heen na die einde; en jy sal rus en weer opstaan tot jou bestemming* (dit was jou ooreenkoms met MY). *aan die einde van die dae.*

So sien u dus dat al drie die groepe engelgeeste, die gevalle rebelle wat Lucifer gevolg het, die gevalle nie-rebelle wat in Lucifer se ryksgebied was en die salige geeste vanuit die Sewe-geestesryk gelyke kans het op die verkryging van kindskap in die Vaderhuis. Elkeen moet egter die volle sewe geeste se eienskappe in homself ontplooi om sodoende die wedloop na die Vaderhuis te voltooi. Tot by die opstanding van ons Verlosser, JaHshua, moes alle gestorwe geeste in die doderyk vertoef het (uitgesluit 'n paar, byvoorbeeld Henog en Elia), maar met JaHshua se oorwinning oor die dood of vlees (Satan) is die deur tot die Vaderhuis geopen. Sien die roete wat eindig by [8].

Verder is hierdie sewe Geeste gedurig as sewe reënboogkleure en vuurfakkels teenwoordig by ons Vader soos in **Openbaring 4:2, 3 en 5** beskrywe.

**2** En dadelik was ek in die Gees, en kyk, daar staan 'n troon in die hemel en Een sit op die troon. **3** En Hy wat daarop sit, het in sy voorkoms gelyk soos die steen jaspis en sardius; en **rondom die troon was 'n reënboog** wat in sy voorkoms gelyk het soos 'n smarag. **5** En daar het weerligte en donderslae en stemme uit die troon uitgegaan, en **sewe vuurfakkels wat die sewe Geeste van God is, het voor die troon gebrand;**

Ook sal u sien dat daar 'n kandelaar was in die Heilige deel van die Tabernakel, wat 'n afbeelding van hierdie sewe geeste was. Die Heilige stel elke mens se siel voor, waarin

hierdie sewe geeste gedurig moet brand, indien jy `n vrugvolle lewe vir JaHshua wil lei.

### **Die Bruid neem die plek in van Lucifer:**

`n Bykomende wonderlike vlak van saligheid wat vir ons bygevoeg is, is die verkryging van Bruidskap, oftewel die Melgisédek-orde van Vrede (blou) **[9]** waarvan JaHshua die Hoëpriester en Koning is. Diegene wat op aarde hulle kindskap verkry het, kan ook reeds op aarde, nou aan die eindtyd, hulle Bruidskap verkry, deur in die vlees wedergebore te word soos in **Openbaring 7** en **14** beskryf. Dan word jy een met jou Man, JaHshua, oftewel JaHshua staan op in jou vlees. Jou siel en jou gees word dus een binne jou, die hemelse huwelik.

Hierdeur kom jy nou nog een stappie nader aan die Vader. Waar jy eers Sy kind was, verenig jy nou met Hom as Sy vrou in die Gees. Alles wat Syne is, word nou ook joune. Die Bruid neem nou die plek in van die LIG **[2]** langs die LIEFDE in die orde wat tot niet gegaan het as gevolg van die val van Lucifer en sal voortaan naas en in JaHshua heers oor die hele Skepping, selfs oor die ryke van die 7 Geeste!

Die bruid sal nou, uit die aard van die posisie van die LIG wat Sy aangeneem het, die rol van die WYSHEID vervul. Elke engelgees wat die pad deur die skepping aan die einde (dit is nou!) suksesvol sal loop, sal in staat gestel word om in die vlees wedergebore te word. Dit is die bruidskap wat verkry word. Die wedergebore man of vrou word dan volkome verenig met JaHshua, die LIEFDE en wel in die geestelike, sowel as in die vleeslike dimensie.

So `n wedergeborene leef dan gelyktydig in beide dimensies, sonder dat die ander aardse mense daarvan bewus sal wees. Hulle sal so `n wedergeborene slegs sien as iemand wat baie talentvol is in geestelike dinge.

Die hoofsaak van die Bruid aan die eindtyd sal wees om die gees van die vals Christus, die vals Melgisédek, die vals Immanuël teë te staan soos in die boeke **Daniël** en **Openbaring** beskrywe. Die twee getuies van **Openbaring 11:3** is die profeet/priester Henog wat die Wysheid voorstel en Elia wat die Krag voorstel, ook genoem Johannes, die Voorloper. Saam met die Liefde, wie JaHshua in die Bruid is, moet hierdie twee getuies dus teenwoordig wees in elke lid van die eindtyd Bruid. Die KRAG stel Haar dus in staat om in LIEFDE en WYSHEID op te tree om sodoende haar taak op aarde te vervul, naamlik om die vals Christus en sy gees teë te staan.

### **Die verlore seun kom huistoe**

Uit hierdie stuk kan dus gesien word dat daar `n volmaak uitgewerkte modelplan deur ons Hemelse Vader opgetrek is, waarvolgens `n negatiewe daad, soos die hoogmoed en gevolglike val van Lucifer, omskep word in die wonderlikste moontlikheid, naamlik om deel te word van die Vaderhuis self, om ook Ben-Elohim (Godeseun) te word en ook om saam of in JaHshua te heers oor die ganse skepping as Sy Bruid!

Hierdie hele val van die geeste word vervat in `n gelykenis wat JaHshua vir ons vertel het gedurende Sy tyd op aarde. Dit is die gelykenis van die verlore seun. Hierdie verlore seun is Lucifer, met elke gevalle gees, wat die pad deur die gevalle skepping en materie (varke oppas en peule eet) moes deurloop. Deur vlees aan te neem en hulle lewensproef suksesvol af te lê, kom hulle weer by ons Vader se huis uit. Die Vader slag dan die vetgemeste kalf vir die verlore seun, sodat hy weer in die geestesryk of Vaderhuis kan inkom.

Die ander seun wat nie sy erfdeel verkwis het nie, maar wat ongelukkig was omdat hy nooit so `n fees vir hom en sy vriende gekry het nie, is die engelgees wat nooit gerebelleer het nie, hy was altyd by sy Vader en alles behoort aan hom. Hy word ook genooi om aan te sit aan die kalfsete, of anders gestel, hy kry ook nou `n kans om vrywillig vlees aan te neem, JaHshua as sy saligmaker aan te neem en in die Vaderhuis in te kom as kind of bruid.

Ons grootste dank en liefde vir `n Vader wat soveel liefde gehad het dat Hy Sy eniggebore Seun, JaHshua, vir ons gegee het om geslag te word, sodat ons nou die ewige Vaderhuis saam met Hom kan beërwe.

**Amein**